

09 FEB 1998

Mohamed-tabung

TABUNG SETIA NEGARA DILANCARKAN

KUALA LUMPUR, 9 Feb (Bernama) -- Menteri Penerangan Datuk Mohamed Rahmat hari ini melancarkan Tabung Setia Negara bagi mengutip derma daripada kakitangan kementerian dan orang ramai untuk membantu kerajaan mengatasi kegawatan ekonomi.

Kutipan itu akan diserahkan kepada badan khas yang akan ditubuhkan oleh kerajaan untuk mengendalikan derma daripada rakyat agar ia dapat digunakan secara berkesan, katanya.

"Derma yang ingin dibuat boleh dalam apa bentuk sama ada wang tunai atau barang kemas," katanya ketika berucap pada perhimpunan bulanan Kementerian Penerangan dan majlis perayaan berkembar di perkarangan Angkasapuri.

Badan khas itu diumumkan semalam oleh Perdana Menteri Datuk Seri Dr Mahathir Mohamad untuk meningkatkan simpanan negara.

Mohamed berkata Jabatan Penerangan dan Jabatan Penyiaran akan menerima sumbangan orang ramai melalui kutipan yang akan dijalankan di seluruh negara.

"Usaha menabung ini bukan bererti keadaan kita sudah jadi panik. Saya fikir tidak, keadaan kita adalah masih baik," katanya.

Katanya ini dapat dilihat daripada tindakan kerajaan dan perkembangan pasaran wang serta pasaran saham yang nampaknya telah meningkatkan keyakinan pelabur dari dalam dan luar negara.

Beliau juga mencadangkan mereka yang selalu ke luar negara supaya menderma "duit kecil" mata wang asing kepada Tabung Setia Negara.

Mohamed berkata kementerian akan membentuk kaedah dan peraturan pengurusan akaun amanah tabung itu dan ia akan dikemukakan kepada Kementerian Kewangan untuk pertimbangan dan kelulusan.

Pada pelancaran tabung itu Mohamed dan ketua-ketua serta wakil jabatan memulakan sumbangan dengan memberi wang tunai.

Mohamed berkata Jabatan Penyiaran dan Jabatan Penerangan akan menjalankan gerakan secara berterusan untuk menyemarakkan semangat rakyat supaya terus menyumbang kepada kesejahteraan negara.

Kedua-dua jabatan itu juga akan terus membantu usaha kerajaan dalam kempen anti-gula untuk mengawal harga, mengurangkan pengaliran keluar mata wang serta menjaga kesihatan rakyat.

Mengenai Tabung Ehsan Wanita yang dilancarkan oleh Perdana Menteri Datuk Seri Dr Mahathir Mohamad semalam, Mohamed berharap ianya mendapat sambutan baik dari kaum wanita.

"Kaum wanita ada peranan untuk menyumbang kepada kesejahteraan negara," katanya. --BERNAMA

TCL RI